

## სამახსოვრო ამომრჩეველთა რეგისტრაციის კომისიის წევრებისთვის

(განკუთვნილია ამომრჩეველთა ვერიფიკაციის აპარატების გამოყენების  
გარეშე კენჭისყრის გასაგრძელებლად)

### გაითვალისწინეთ!

**ვერიფიკაციის აპარატის გარეშე კენჭისყრის გაგრძელებისას**, კომისიის თავმჯდომარე რეგისტრატორს გადასცემს ამომრჩეველთა სამაგიდე სიას (ფოტოსურათებით), ერთ-ერთ რეგისტრატორს ასევე სპეციალურ სიას (ასეთის არსებობისას). რეგისტრატორების მაგიდასთან გამოიკვრება რეგისტრატორების მაგიდაზე განლაგებული სიების შესაბამისად ამომრჩეველთა გვარების ანბანური თანმიმდევრობა და ამომრჩეველთა ნომრების თანმიმდევრობა.

ამომრჩევლის რეგისტრაციის მიზნით:

- სთხოვთ ამომრჩეველს, წარმოადგინოს საქართველოს მოქალაქის პირადობის მოწმობა ან საქართველოს მოქალაქის პასპორტი.
- შეამოწმეთ, არის თუ არა ამომრჩეველი შეყვანილი ამომრჩეველთა ერთიან ან სპეციალურ სიაში და შეადარეთ ამომრჩევლის პირადი ნომერი ამომრჩეველთა სიაში არსებულ ნომერს.
- შეამოწმეთ წარდგენილ დოკუმენტში აღნიშნული ამომრჩევლის საარჩევნო მონაცემებისა და ამომრჩეველთა სიაში არსებული მონაცემების შესაბამისობა.



### ყურადღება!

- ✓ თუ ამომრჩევლის სახეს და წარდგენილ პირადობის დამადასტურებელ დოკუმენტში/ამომრჩეველთა სიაში არსებულ ფოტოსურათს ერთმანეთთან შეუსაბამოდ მიიჩნევთ, აღნიშნული შეუსაბამობის დადასტურების თაობაზე მიმართეთ კომისიის თავმჯდომარეს და დაელოდეთ მის მითითებებს. თუ კომისიის თავმჯდომარე შეუსაბამობას არ დაადასტურებს, უფლება გაქვთ, კენჭისყრის დღის ჩანაწერთა წიგნში მიუთითოთ თქვენი განსაკუთრებული აზრი, რასაც კომისიის მდივანთან ერთად ამოწმებთ ხელმოწერით. წარდგენილ პირადობის დამადასტურებელ დოკუმენტში/ამომრჩეველთა სიაში არსებულ ფოტოსურათთან ამომრჩევლის სახის შეუსაბამოდ მიჩნევის მიუხედავად, ამომრჩეველი იღებს მონაწილეობას კენჭისყრაში.
- ✓ თუ ხმის მისაცემად გამოცხადებული ამომრჩეველი შეყვანილია გადასატანი საარჩევნო ყუთის სიაში, ან სხვა უბნისთვის განკუთვნილ სპეციალურ სიაში, ან მისი მონაცემები არ იძებნება ერთიან სიაში, მას საარჩევნო უბანში აეკრძალება კენჭისყრაში მონაწილეობა.
- ✓ ამომრჩეველი, რომელსაც ერთიან სიაში მინიჭებული აქვს სტატუსი „იმყოფება უცხოეთში“ ან „საკონსულო აღრიცხვაზე“ კენჭისყრაში მონაწილეობას იღებს ზოგადი წესით.

- ამომრჩევლის მონაცემთა შესაბამისობის დადასტურების შემთხვევაში, ამომრჩეველს გაუკეთეთ მარკირება მარჯვენა ხელის ცერა ან საჩვენებელი თითის ფრჩხილზე, თუ აღნიშნული მოქმედების შესრულება შეუძლებელია - მარჯვენა ხელის სხვა თითებზე, ხოლო თუ ესეც შეუძლებელია, იმავე წესით მარცხენა ხელზე.



### გაითვალისწინეთ!

- ✓ თუ ამომრჩეველი უარს აცხადებს მარკირებაზე, მას არ აქვს კენჭისყრაში მონაწილეობის უფლება და არ უნდა გადასცეთ საარჩევნო ბიულეტენი.
- ✓ ამომრჩეველი, რომელსაც არ აქვს ზედა კიდურები („ფიზიკური მდგომარეობის“ გამო), არ გადის მარკირების პროცედურას.

- ხელი მოაწერეთ ამომრჩეველთა სიის სათანადო გრაფაში ამომრჩევლის გვარის გასწვრივ და მიუთითეთ ამომრჩეველს ასევე მოაწეროს ხელი შესაბამის გრაფაში.



### გაითვალისწინეთ!

- ✓ თუ კენჭისყრის პროცესში გამოვლინდა, რომ ამომრჩეველმა სიაში ხელი მოაწერა სხვა ამომრჩევლის გვარის გასწვრივ არსებულ გრაფაში, ასეთ შემთხვევაში ამომრჩეველს, რომლის გვარის გასწვრივ ფიქსირდება ხელმოწერა, უნდა მიუთითოთ ხელი მოაწეროს იმავე გრაფაში. ამასთან, აღნიშნულის თაობაზე უნდა დაწეროთ ახსნა-განმარტება (ამომრჩევლის სახელის, გვარის და სიაში მისი რიგითი ნომრის აღნიშვნით).
- ✓ თუ კენჭისყრაში მონაწილეობას იღებს ამომრჩეველი, რომელსაც არ აქვს ზედა კიდურები („ფიზიკური მდგომარეობა“), ამომრჩეველთა ერთიანი სიის გრაფაში „ამომრჩევლის ხელმოწერა“ უნდა გააკეთოთ ჩანაწერი „ფიზიკური მდგომარეობა“ და აღნიშნული დაადასტუროთ ხელმოწერით.

- რეგისტრაციის პროცედურის დასრულების შემდეგ, ამომრჩეველს გადაეცით საარჩევნო ბიულეტენი, ხმის მიცემისთვის განკუთვნილ სპეციალური ჩარჩო-კონვერტი და განუმარტეთ მისი გამოყენებისა და საარჩევნო ბიულეტენის შევსების წესი “ფარული კენჭისყრის კაბინაში ბიულეტენზე სრულად გააფერადეთ თქვენთვის სასურველი მხოლოდ ერთი კანდიდატის წინ არსებული წრე. ამოაბრუნეთ ბიულეტენი, მოათავსეთ სპეციალურ ჩარჩო-კონვერტში თქვენი არჩევანის ფარულობის უზრუნველსაყოფად”

### ყურადღება!

ამომრჩეველს ამავე საარჩევნო ბიულეტენზე სპეციალური მარკერის გამოყენებით გააფერადებინეთ სპეციალურად გამოყოფილ ადგილზე არსებული საცდელი წრე.

- მიუთითეთ ამომრჩეველს, შევიდეს ფარული კენჭისყრის კაბინაში.



**ვერიფიკაციის აპარატის გარეშე კენჭისყრის გაგრძელებისას**, საუბნო საარჩევნო კომისიის თავმჯდომარის მითითებით, ამომრჩეველთა რეგისტრატორები 10:00, 12:00, 15:00, 17:00 და 20:00 საათზე ითვლიან ამომრჩეველთა სიებში ამომრჩეველთა ხელმოწერების რაოდენობას.